

**Paris-imi isumaqatigiissummut Kalaallit Nunaata nunamut nangaassuteqarnera atorunnaarsinneqassasoq aammalu Naalagaaffiit Peqatigiit Silap pissusia pillugu nunani tamalaani isumaqatigiissutaannut, UNFCCC-imut, nalunaarutigineqassasoq, danskit naalakkersuisuinut nalunaarutigeqqullugu Naalakkersuisut peqquneqarnissaat pillugu Inatsisartut aalajangiiffigisassaattut siunnersuut**

(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

**Akissuteqaat**

(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

**Aappassaanneerpeqarnera**

Naalakkersuisut sinnerlugit Eqqissimatitsinermut Avatangiisinullu Ataatsimiititaliaq sukumiisumik sulisimaneranut isumaliutissiissuteqarneranullu qutsavigaara.

Naalakkersuisut paasivaat ataatsimiititaliami amerlanerussuteqartut Inuit Ataqaatigiinneersut aamma Siumumeersut allannguutissatut siunnersuummik akuerineqartussamik saqqummiussipput.

Naalakkersuisut nuannaarutigingaarlugu oqaatigisinnaavaat, Parisimi isumaqatigiissut Kalaallit Nunaata ilannguffiginiaraa United Nations Framework Convention on Climate Change-mut nalunaaruteqaqqullugit Naalakkersuisut peqquneqassasut, ataatsimiititaliami amerlanerussuteqartut inassutigimmassuk.

Parisimi isumaqatigiissutip ilaaffigilerneratigut silap pissusaani ajornartorsiornermi akisussaaqataalernissamik iliuuseqarnissamillu Naalakkersuisut kissaateqarnerat, ataatsimiititaliami amerlanerussuteqartut tapersersormassuk, Naalakkersuisut tamanna tikilluaqqaat.

Nunamut nangaassuteqarnek aammalu Parisimi isumaqatigiissutip ilaaffigilernissaa pillugit toqqaaneq, Kalaallit Nunaata nammineeirluni kissaateqarnera malillugu pissasoq, ataatsimiititaliap isumaliutissiissummini pingaartissimavaa. Tamanna isumaqatigaara. Kalaallit Nunaata suliassa qarfik silap pissusaa tigoreersimavaa, aammalu suliassa qarfimmi tassani Kalaallit Nunaat kisimiilluni aalajangiisinnaavoq.

Tassunga tunngatillugu Namminersornermut inatsit aammalu Inuiaat pisinnaatitaaffii naapertorlugit inuiaat pisinnaatitaaffiini tunngaviusut innersuussutigalugit, maleruagassat, tunngaviusut suleriaasissallu sukkulluunniit atuuttut, Naalakkersuisut malinniarpaat kiisalu susassaqtartut allat peqataatinnerisigut.

Parisimi isumaqatigiissutip ilaaffigilernissaa aalajangiinerusussaavoq nunatsinnut pingaaruteqartoq. Uagutsinnuinnaangitsoq, kisianni aamma meeqqatsinnut, ernuttatsinnut siunissamilu kinguaariinni kinguaassatsinnut. Silap pissusaata allanngoriartorneri pissusiviusuni aarlerisaarisuupput, ulluinnatsinnut, kulturitsinnut inuussutissarsiorortatsinnullu sunniisarlutik. Aap, inuunitsinnut ullumikkut ilisimasatsinnut tamarmut. Parisimi isumaqatigiissutip ilaaffigilernerani akisussaaffimmik tigusissaagut. Aammalu akisussaaffimmik tigusilluta nunarsuaq tamakkerlugu takutissavarput. Kinguaassatsinnut takutissavarput siunissaat pingaartilluinnaripput aammalu pitsaasumik inuuneqarnissamut pitsaanerpaanik atugassaqtartikkusukkiqut. Ilaaffigilernissaanik aalajangiinermi Inatsisartut iliuuseqarsinnaassuseqarlutik, aalajangiisinnaassuseqarlutik aammalu nunarput nunarsuarpullu isumassorusullugu takutissavaat.

Parisimi isumaqatigiissutip ilaaffigilernissaa pillugu oqallinneq oqaloqatigiiffiusimavoq oqalliffiusimallunilu – maani inersuarmi aammalu inuiaqatigiinni. Ilaaffigilernerani suut kingunerissanerai, sunut pituttusanersugut aammalu tamanna siunissami ineriartornissatsinnut qanoq sunniissanersoq apeqquserneqartarsimapput.

Naalackersuisooqatigiit ernumassuteqarunnaarsitsiniarlutik apeqqutillu akissutissarsiniarlugit Parisimi isumaqatigiissutip inuiaqatigiinnut sunniutissaannik misissueqqissaarnermik suliaqarniarlutik siunnerfeqarsimapput. Misissueqqissaarneq pereersimavoq. Taanna Inatsisartunut ilaasortanut saqqummiunneqareerpoq. Apeqqutitut akissutit paatsuugassaangillat: Parisimi isumaqatigiissutip ilaaffigilernerani aningaasaqarnikkut ineriartornissamut periarfissagut annikillissusaangillat – naamerluinnaq. Tassami qanoq ilaaffigilerniarnerlugu nammineerluta aalajangertussaavarput.

Parisimi isumaqatigiissutip ilaaffigilernerani pissusiviusut atukkagut aallaavigalugit pissaaq. Piumasaqaatigut periarfissagullu aallaavigalugit. Parisimi isumaqatigiissut atorlugu inuiaqatigiinnut kalaallinut inuiannullu siuariartortitsisinnaavugut siumullu ingerlatitsisinnaalluta. Tassami ullumikkut nunarsuarmioqatigiinni, tamaginnut pitsaanerumik naapertuilluarnerumillu siunissaqalersitsinissamut suliniuteqartuni, ataatsimooqatigiinnermi ilaareerpugut. Tamanna uagutsinnut kinguaassatsinnullu iluaqutaasussamik periarfissiisussaavoq.

Apeqqutit maannakkut akissutinik taarserneqarput. Suliap ingerlasimanera nuannaarutigaa. Peqqinnartumik oqartussaqaatigiippugut aammalu innuttaasut siunissaminnik aallussipput. Taamatut oqaaseqarlutik Naalackersuisut allannguutissatut siunnersuummut matumunnga tapersiipput, tamatumalu akuerineqarnissaa inassutigalugu:

**Kalaallit Nunaata Parisimi isumaqatigiissummut ilanngunnissamik siunertaqarnerata Naalagaaffiit Peqatigiit Silap pissusia pillugu nunani tamalaani isumaqatigiissutaannut, United Nations Framework Convention on Climate Changeimut (UNFCCC) nalunaarutigineqarnissaanut Naalackersuisut peqquneqarnissaannik Inatsisartut aalajangiiffisassaattut siunnersuut.**